

17 JUL 2003

PEMILIK PREMIS DIMINTA CAT SEMULA BANGUNAN

ALOR STAR, 17 Julai (Bernama) -- Pemilik-pemilik premis di sini akan diminta mengecat bangunan masing-masing sebagai usaha menceria dan mengindahkan bandar Alor Star menjelang pengisytiharannya sebagai bandar raya.

Yang Dipertua Majlis Perbandaran Kota Star (MPKS), Datuk Yusof Nayan berkata satu surat pekeliling akan dikeluarkan tidak lama lagi bagi meminta kerjasama para pemilik premis.

Beliau berkata sebagai persediaan ke arah mencapai status itu, MPKS juga akan memperkenalkan pusat-pusat aduan, talian bebas tol, bilik gerakan serta menyediakan pegawai bertugas sehingga 12 tengah malam.

"Ini adalah sebahagian daripada tindakan yang sedang dilakukan sebagai memenuhi kehendak pelanggan-pelanggan yang merupakan pembayar cukai," katanya kepada pemberita pada majlis taklimat persediaan ke arah Majlis Bandar Raya Alor Star di sini, hari ini.

Mengenai penangguhan tarikh pengisytiharan pada 22 Ogos ini, beliau berkata ia berikutan sambutan Hari Patriotik Kebangsaan bagi mengenang jasa dan perjuangan Perdana Menteri, Datuk Seri Dr Mahathir Mohamad yang akan diadakan pada hari itu.

-- BERNAMA

SN MOZ